



Diahuebs 12 Januari 2023

Email: IslaOnline@gobierno.aw Tel: 528-4952

 **ISLA**ONLINE

Noticia di Gobierno

2023






DURANTE REUNION ENTRE ARUBA, CORSOU Y SINT MAARTEN A DELIBERA RIBA SIMILARIDADNAN Y RETONAN

Recientemente tabatin reunion tripartite na Sint Maarten entre Prome Minister di Aruba Evelyn Wever - Croes, Prome Minister di Corsou Gilmar 'Pik' Pisas y Prome Minister di Sint Maarten Silveria Jacobs, riba diferente punto riba agenda.

E reunionnan tripartite ta algo comun y cu ta tuma lugar regularmente. Durante e encuentronan e tres paisnan ta delibera riba similaridadnan y retonan, pa mira unda por yuda otro cu idea, sugerencia, of cu accion. Den aña 2023 trahando hunto y den union, por logra surpasa e retonan aki.

Por ultimo, Premier Wever - Croes a indica cu a repasa e agenda cu lo wordo trata hunto cu Hulanda e siman aki, pa por ta bon prepara pa e demas reunionnan.





Comision Celebracion Dianan Nacional ta informa:

POSIBILIDAD PA BENTA DI CUMINDA, COS DUSHI Y ARTESANIA RIBA PLAZA BETICO CROES DURANTE MANIFESTACION CULTURAL DI 24 JANUARI 2023



Desde aña pasa na luna di februari, Aruba a drenta den e normalidad nobo y eventonan publico por wordo organisa bek. E aña aki Dia di Betico lo por wordo celebra manera custumber. Dia 24 di januari anochi lo organisa bek e manifestacion cultural publico riba Plaza Libertador G.F. Betico Croes.

Comision Celebracion Dianan Nacional ta preparando un bunita programa pa e anochi special aki riba plaza pa honra e memoria di nos gran Libertador. Durante e manifestacion cultural, Minister di Cultura lo hiba un discurso na comunidad relaciona cu e dia nacional aki. Riba e anochi aki un programa ta wordo presenta riba escenario cu e.o. canto, baile, teatro di

nos artistanan local. Riba plaza mes ta wordo organisa un feria cu benta di cuminda, boca dushi y artesanía local.

Pa medio di e comunicado aki ta invita tur esnan cu ta desea pa huur un tent sea pa bende cuminda, cos dushi of artesanía riba Plaza Betico Croes pa tuma contacto cu Departamento di Cultura na telefoon 582-2185 pa sigura nan tent y ricibi tur informacion. Por contact parti mainta entre 8 or di mainta pa 11 or y mey y despues di merdia for di 1 or y mey pa 4 or di atardi. Tene na cuenta cu tur esnan cu lo bay bende cuminda mester tin nan caarchi berde valido y cu e tentnan ta limita.



A FIRMA ACUERDO ENTRE TPEF Y FUNDACION STIMAMI STERILISAMI



Minister Dangui Oduber su maneho di turismo no solamente ta dirigi riba target turista di calidad, mehoracion di servicio y upgrading di area turistico pero tambe e ta basa pa crea un balans positivo pa e comunidad di Aruba incluyendo nos amigonan di cuater pia cu no tin un dak riba nan cabes.

Pa e motibo aki diahuebs mainta den un conferencia di prensa conhuntamente cu president di e board di "Tourism Product Enhancement Fund" (TPEF) sr. Arends y tambe e president di Fundacion Stimami Sterilisami (FSS) sr. Biemans, Minister Oduber a anuncia y firma un acuerdo caminda un biaha mas TPEF ta bay duna sosten financiero na FSS. E fundacion aki ta pa yuda cu sterilisacion di cacho y pushi nan di caya y tambe pa yuda doñonan sterilisa nan mascota. E programa di sterilisacion aki ta un colaboracion di sector publico conhunto cu sector priva.

E Fundacion di Stimami Sterilisami ta ricibi subsidio for di TPEF anualmente cu excepcion di aña 2021 debi na e pandemia. Nan ta haci hopi bon uzo di esaki y ta traha na un manera eficiente. Nan ta traha cu 5 diferente veterinarianan di Aruba. Durante aña 2022 e fundacion a logra steralisa un total di 3686 pushi y cacho riba nos isla y nan tin como meta den aña 2023 pa sterilisa alrededor di 5 mil/6 mil pushi y cacho.

Minister Oduber ta kere firmemente cu e manera con nos ta



trata nos animalnan ta bisa hopi di nos como nacion. Abase di programanan asina, den wowo di nos bishitantenan ta eleva e imagen di e producto Aruba y ta cumpli cu e vision di Ministerio di Turismo. E meta ta pa haci nos comunidad mas consciente riba e problematica aki, mantene e mascotanan den cura ta evita cu nan ta keda reproduci. Lo bay sigui enfoca riba e campananan di conscientisacion pa tene nos comunidad bon informa.



PROYECTO EDIFICIO RENOBACION DI DAS Y PROYECTO PLAZA TINO RUIZ DEN PLENO EHECUCION

Minister di Husticia y Asuntonan Social Sr. Rocco Tjon a reuni cu DOW y Monumentenbureau caminda a toca e proyecto di Departamento di Asuntonan Social (DAS), un proyecto cu ya caba a wordo aproba y e trabounan a wordo termina aña pasa, sinembargo no a ser completa pa motibo di algun contra tiempo, cual awo por continua bou supervision di Monumentenbureau. Banda di esaki a sinta tambe cu DOW pa toca e proyecto di Plaza Tino Ruiz (QEPD) cua ta cla pa inicia.

Manera a indica, e proyecto di e edificio di DAS tawata tin un contratiempo grandi pa motibo cu gran parti di e dak ta lek awa, pa cual motibo a reuni pa asina por percura cu e trabounan pa repara esaki por wordo ehecuta dentro di e cincuenta dianan cu ta stipula pa cu esaki. Monumentenbureau ta bay keda encarga cu e parti di supervision pa asina garantiza cu e edificio por keda den su estado original segun rekisitonan di Monumentenbureau. Unabes cu esaki keda cla, e trabounan di renobacion pa DAS por continua pa loke ta e siguiente fasenan. Pues, ta trata di dos fase cu ya caba a wordo aproba, un inversion di mas cu un miyon florin pa tur e renobacionnan por keda cla e aña aki, pa cual e personal di DAS cu aworaki ta ubica den un otro edificio, por muda bay bek na nan edificio completamente renoba.

Banda di esaki, a reuni cu DOW tambe tocante e proyecto di Plaza Tino Ruiz (QEPD), cual ta completamente aproba y a wordo otorga na e compania cu a gana e destaho, pa asina e trabounan por inicia y asina den cincuenta dia di trabou e plaza aki por bira un realidad. Di e forma aki KPA y e famia di Tino Ruiz den feliz memoria por tin un luga caminda ta honra Tino, es decir e ta haya su propio luga caminda tur hende por bay pa recorde pa tur e trabounan cu el a desplega pa Aruba. E mantencion di e plaza ta wordo presupuesta, pasobra e bedrijfsvoering di cada dienst ta tene cuenta cu e parti di mantencion. Generalmente, esaki ta algo cu semper ta tene cuenta cune den e presupuesto di pais Aruba.





MINISTER ENDY CROES A REUNI CU SR. DAROUL CROES



Recientemente, Minister Endy Croes a reuni cu sr. Daroul Croes den cuadro di e rapport Doorlichting van het Arubaanse Onderwijsbestel. Sr. Croes den pasado a eherce varios funcion den Ministerio di Binnenlandse Zaken en Koninkrijksrelaties (BZK) na Hulanda Caribense. Sr. Daroul Croes ta coordina varios aspectonan den cuadro di preparacion di e Plan van Aanpak cu lo desemboca despues di e Uitvoerings Agenda di e Landspakket.

Landspakket den su totalidad ta wordo lidera pa sra. Indra Zaandam mientras e parti enseñansa, ta wordo forma pa Directie Onderwijs, Inspectie Onderwijs, sr. Daroul Croes y conseheronan di Minister Endy Croes cu ta forma parti di e ekipo. Actualmente tin varios reunionnan tumando lugá cu e Tijdelijk Werk Organisatie (TWO/BZK) y Ministerio di Onderwijs,

Cultuur en Wetenschap (OCW) pa loke ta regarda enseñansa. Durante e encuentro cu Minister Endy Croes a dialoga tambe riba diferente puntonan di interes cu lo wordo trata durante e Vierlandenoverleg cu ta tuma lugá siman entrante na Curaçao.

Mandatario di Enseñansa a enfatisa cu e tabata un bon reunion unda a coordina varios aspectonan pa cu ehecuracion di e Uitvoerings Agenda específico di e Landspakket di enseñansa.

**NOS ACTITUD POSITIVO
TA NOS FORSA PA SOLUCIONA
CADA RETO Y CREA
OPORTUNIDADNAN NOBO.**



MINISTER ENDY CROES TA FELICITA COLEGA MINISTER ROCCO TJON CU E PROYECTO DI CAMARA DI VIGILANCIA

Minister Endy Croes ta felicita colega Minister Rocco Tjon pa e tremendo trabou cu el a realisa recientemente cu e instalacion di camara na e zonanan di riesgo "hot zones" di Aruba. Desde aña pasa Minister Rocco Tjon a cera un acuerdo cu Servicio di Telecomunicacion di Aruba (SETAR) pa ehecucion di e proyecto aki. E proyecto ta parti den cuater fase. E prome fase, ta completamente finalisa ta trata aki di camara di vigilancia pa henter e zona di hotel "high-rise hotel area", pues cuminsando for di Eagle Beach te cu Fisherman's hut. Tambe ta inclui 2 camber di vigilancia, uno na warda na Shaba y uno na Centro di Husticia na Macuarima. Fase 2, 3 y 4 ta aproba caba y lo wordo ehecuta pronto.

E di dos fase ta encera camara den e zonanan di hotel y/of area di entretenimento (tur caminda cu por drenta e zona aki). E area aki lo ta completamente bou vigilancia di camara y lo señala tur trafico cu drenta e area aki. Di tres fase ta encera camara den e centro di San Nicolas y di cuater fase ta consisti di un centro operacional, unda cu ta planifica pa tin un ekipo multidisciplinario cu ta consisti di personal di diferente departamento hudicial pa



vigila e camaranan 24/7. Concluyendo Minister Endy Croes ta felicita Minister Rocco Tjon, Ministerio di Husticia, Cuerpo Policial Aruba y tur stakeholders cu nan excelente trabou. Garatisa siguridad riba nos isla hopi importante pa nos mes, como tambe pa e zona turistico ta bou vigilancia, mirando cu turismo ta nos pilar economico cu nos mester cuida.

Minister Endy Croes:

2023 TA PREMIRA DI BIRA UN AÑA GRANDI PA DEPORTE NA ARUBA

Diaranson atardi, Minister Endy Croes a reuni cu ekipo di maneho di IBISA unda cu a revisa y repasa e programa deportivo pa aña 2023. E proyectonan cu ta programa pa wordo ehecuta e aña aki ta e.o.: Weganan Interinsular, Weganan Escolar (WE) Aruba, Koningsspelen, Betico Run, Half Marathon, Summer Camp, School Sport Program, Healthy Life, Diadomingo Activo y Caya Recreativo. Tambe a dialoga riba e proyecto di dak pa e speelplaats pa IBISA San Nicolas.

Un otro proyecto cu lo wordo realisa den 2023 ta Johan Cruyff futbol veld pa e barrio di Sabana Basora. Minister Endy Croes a enfatisa cu tur cos ta alinea y ta canando segun plan. Aña 2023 ta priminti di bira un aña grandi pa deporte na Aruba. Finalisando Minister Endy Croes



a expresa; nos trabou ta pa coordina, tuma decision y percura pa tur cos cana bon. Nos ta sigui traha cu e deseo, disciplina, dedicacion, determinacion pa deporte en general na Aruba.





RECONOCE BO IMPACTO PA BO DESPERDICIO RESIDENCIAL OF COMERCIAL:



(Aruba's waste management blueprint)


Bo ta di acuerdo cu mester cambia e manera di anda cu bo desperdicio?

NO, Mi ta scoge pa sigui cu Serlimar of Ecotech pa recohe mi desperdicio.
*e opcion aki no tin cambio di prijs

Un gran parti di mi desperdicio lo wordo procesa pa poni den bales y deposita na Sero Teishi

SI, Mi ta scoge pa haci algun cambio den mi cas/negoshi.
*e opcion aki lo por tin cambio di prijs, algun ta pornada, algun pa un prijs chikito y algun bo ta haya placa a cambio.

Bo opcion pa cada tipo di desperdicio:



Bo kier haci mas?

Si.

Reuza mas tanto posibel

Minimalisa bo cantidad di desperdicio

Cumpli cu ley "Milieu schadelijke Producten"



E herarkia di desperdicio ta indica e impacto di e metodo cu ta wordo uza pa procesa desperdicio.



Ministerio di Transporte, Integridad, Naturala y Asuntonan di Adulto Mayor

"Nada no ta cambia, si nada no cambia!"

Reconoce bo impacto, un Aruba dushi ta un Aruba cu nos por maneha nos sushi!"

Minister Ursell Arends

www.trashtocasharuba.org


Pa mas informacion:

[HTTPS://TRASHTOCASHARUBA.ORG/PAGES/DUMP-PARKIETENBOS](https://trashtocasharuba.org/pages/dump-parkietenbos)



NOS ACTITUD POSITIVO TA NOS FORSA PA SOLUCIONA CADA RETO Y CREA OPORTUNIDADNAN NOBO.

Aña 2023 lo trece hopi cambio pa cada un di nos, y nan impacto riba cada un di nos lo ta fuerte. Sin embargo ban carga e positivismo cu tur e cambionan aki lo trece cosnan bon pa nos, lo crea e progreso y bienestar cu nos ciudadanonan merece. Aruba ta un pais bendiciona, y cu fe den nos Todopoderoso, nos mester carga e positivismo cu tin cosnan grandi nos dilanti. Nos actitud positivo, cu ta permiti nos mira e solucion pa cada reto y oportunidad nobo den cada situacion.



————AÑA DI UNION Y POSITIVISMO! ————